



廣州文藝叢書

# 珠江淚

新 粵 劇

陳殘雲原著

南文聯粵劇研究組改編

馬師曾 楊子靜 陳卓瑩

撰曲

八 同 書 屋 刊 行

書叢藝文州廣

# 淚江珠

——劇粵新——

著原雲殘陳

編改組研究劇粵聯文南華

瑩卓陳 靜子楊 曾師馬

曲撰

廣州文藝叢書

# 珠江淚

陳殘雲原著

華南文聯粵劇研究組改編

馬師曾 楊子靜 陳卓瑩

撰曲

• 版權有 •

編輯者：

華南文學藝術界聯合會

廣州文德路六九號之一

刊行者：

人間書屋

廣州永漢北路二四九號  
電報掛號二七五五

出版期：

一九五〇年十一月

基本定價：

三元九角

印刷者：

國華印刷廠

廣州市西湖路四十四號

## 重要人物表

阿牛 廿六七歲的農民。

縮頸雞 卅餘歲的農民。

牛嫂 廿四歲，農村女人。

表嬸 近五十歲，從鄉下出廣州的梳頭婆。

官仔貴 卅六七歲，鄉下的地主惡霸。

李鄉長 四十餘歲，烟精。

官仔貴妾 廿多歲。

大隻四 卅四五歲，鄉下出城的苦力。

三姑 五十歲左右，錫母。

亞梅 廿七八歲，私娼。

黑仔洪 卅歲左右，爛蕙。

陳 七 卅歲左右，兵販子。

四 婆 五十多歲，窮老太婆。

趙專員 四十多歲，官僚。

顯 婦 四十多歲。

## 第一場

時：抗戰勝利後的不久，某日上午。

地：廣東珠江區某鄉。

人：專員、官仔貴、阿牛、縮頸鷄、癩婦、表嬸、四婆、農民、農婦若干人、馬弁二人、舞獅若干人。

景：鄉間的廣坪，正面搭慶祝台，有橫額寫着「慶祝抗戰勝利暨歡迎趙專員蒞鄉」字樣。（大笛披星頭，燒爆竹開幕。）

（舞獅鑼鼓，羣衆舞獅及大頭佛戲獅，燒爆竹過場。）

（撲燈蛾鑼鼓，專員帶兩馬弁與官仔貴出，上慶祝台受賀介。）

（阿牛舞獅頭，縮頸鷄舞獅尾隨扮大頭佛上，同專員舞前退後三次作賀禮，舞完放下獅頭，抹汗喘氣介。）

貴：（白攬）齊慶賀（雙）第一係賀國家，而家抗戰勝利左。打敗的蘿蔔頭，再唔使受戰禍。第二係賀趙專員，官運亨通施政妥。（對衆）專員係我地父母官，今日到嚟視察好奔波，大家拍掌歡迎，請專員訓話要聽清楚。（雙句）（領導衆人拍掌介）

專員：（撲燈蛾白攬）抗戰經已八年，而家勝利天光咯。中國列爲四強之一，從此就嘅得多。今日本專員到嚟，任務係有一個。就係調查敵僞時代，有冇漢奸走狗將你地折磨。有就盡地講出嚟，唔使話怕惹禍。（雙句）

貴：（驚懼介，白）冇！冇！

雞：（卽拉開阿牛，低聲白）阿牛！日本仔時代，官仔貴恃住架頭勢力，作威作福，都害得我地慘喇！而家專員嚟到，叫我地訴苦伸冤，唔使怕佢嘅嘞！講喇嗎！

牛：（初尙膽怯，再受縮頸鷄鼓動，衝動介，白）冇錯，有仇不報非君子！幾大就幾大，講！（磨拳擦掌，指住貴對專員白）專員，我要告佢！（重一搥起禿頭二王）你你你，你所作所爲提起就當堂起火，你當日恃住架頭勢力喺處作惡諸多。你替敵人打探軍情又把飛機場嚟築妥，組織維持會攞錢攞命重慘過閻羅。又找花姑娘送到日本軍營個一間慰安所，最慘係，你開烟開賭唔知害左人命幾多。其實你罪名，（一搥，說不出介，忙問阿鷄，白）喂！阿鷄！佢重有乜野呀？

（縮頸雞對阿牛耳語介）

牛：（再指罵貴介，花上句）總之一句講齊，你係個食人唔嚙骨嘅漢奸，拉去打靶都有乜錯。

貴：（威喝介，白）阿牛，縮頸雞，你兩個咪亂噏囉！（花下句）你地的確糊塗混賬將我詆譟諸多。咪個下扒輕輕須知誣告就要反坐。

專：（擺官架子，嚴厲地對貴驥一眼，哼一吓鼻。）（花下句）右檳榔就唔噏得出汁，佢地未必信口開河。本專員辦事無枉無偏一定要調查清楚。

貴：（當堂失色，尷尬，對牛白）阿牛哥……

牛：（白）挑！唔使哥哥聲咁好口噏！

貴：（口鼓）牛哥，想我對鄉里一向都有難為，對你亦都唔錯嘅？

牛：（連續搖頭說反話介，白）唔錯！唔錯！

貴：（口鼓）專員，喺！咁可見佢頭先叅說話，不過以訛傳訛。

專：（白）我當然唔會聽佢一面之詞嘅。（對牛迫問介口鼓）阿牛！你頭先告佢在淪陷時期種種罪名，係真情抑或架禍？！最好提出真贓實證，（介）唔使顧忌咁多㗎。

牛：（擲槌，拉阿鷄驚介，白）死嚟！阿鷄！專員問擺贓證，事過情遷，邊處搵證據至得㗎！

鷄：（拍心口介，白）我可以證明你嘅話，珍珠都有咁真呀！

牛：（白）你都死嘅！專員唔信我嘅話，就信你嘅話咯嘢？棧話我地係串埋一氣啲！

貴：（見兩人徬徨，威嚇介，口鼓）喂！我勸你兩人，唔好攪事生端，想嚟訛詐我。提唔出證據，（介）怕你地都幾惡收科。

（阿牛阿鷄更驚，互相錯愕介）

（內場，癲婆狂笑聲）

牛：（聞聲有計，拍阿鷄膊頭介，白）得嘞！縮頸鷄，呢趟有證據咯。

（冲頭，阿牛入什邊，拉出癲婆介）

牛：（白）專員，呢個就係人證嘞！（對癲婆白）神經二孖，你被官仔貴害得够慘喇！趁而家專員喺處，我搵你嚟伸冤訴苦，你要醒醒定定，數臭佢喇！

癲：（指貴切齒恨介白）哼我把你個官仔貴，你個冇天裝！（口鼓）你正一係禽獸心腸，害到我

人亡家破。將我丈夫監生埋葬，重迫死我嘅家婆。霸曬我的田地耕牛，累到我個仔有十年監坐。累到我走頭無路，至有自盡投河。（快花）今日求生不得，（一搥）求死又不能，（一搥）捱盡淒涼苦楚。總之害人害物，你嘅罪惡多多。我恨不得食你嘅肉（一搥）寢你嘅皮

（一搥）拚之犧牲，同你拚過。（先鋒鉞撲上前糾纏貴介）

（官仔貴忙閃避，馬弁忙攔住，衆人代爲憤怒不公平）

牛：（白）專員，係喇喇呢的就係真憑實據。

衆：（齊白）唔好放過佢呀！一於要嚴辦至得！（人聲喝可介）

專：（喝白）咪嘈！（三脚櫈下句）我自然有分數，扶弱把強鋤。肅奸嘅案情，更非同小可。查明定必嚴辦，唔會漏網羅。（故意向貴示威介）

貴：（接三脚櫈）專員呀專員，呢個分明係癲婆。佢嘅神經錯亂，說話順口開河。（花）請專員屈駕多留，慢慢調查清楚。（暗示講數求情介）

專：（會意介，花下句）呢件案一於「秉公辦理」，（一搥）你地先行返去，聽候解決如何。

（四鼓頭熄燈變景）

時：緊接上場日景。

地：官仔貴家。

人：官仔貴、其妾三姨太、趙專員、鄉長、家丁或女工人。

景：鄉間地主的中式客廳佈置相當華麗，台中設酸枝圓檯，配四張椅。

（燈漸亮，奏「重逢」譜子，官仔貴兩邊焦急踱着，愁眉苦臉）

（三姨太衣邊房門出，態度妖冶）

（官仔貴剛踱到衣邊，一搥相見。擲搥，由頭至腳打量介）

太：（白）唉！撞鬼咩？眼定定望住我做乜得㗎？

貴：（嘆氣介，白）唉！你唔知咯！（反線中板）因為我頭先，陪專員開會遇啱阿牛個冚家剷。佢向專員，嚟控訴，話我係敵偽漢奸。重攞埋個嬬婆做證人，攞到我當堂眼坦坦。歸家來，無從解釋所以心內憂煩。我見嬌卿，（花）靈機一觸，想利用你解圍於一旦。

太：（詐嬌白）搵我點解圍啫？

貴：（長花下句）求你消災難，解麻煩，利用美人妙計去轉圍，獻媚個專員休怠慢，迷湯飽灌你又何難，賣弄風情等佢生滋貓入眼，算佢正人君子，都會入情關。（上句）搭上手時就乜都好辦。

太：（白）我唔製！（花下句）你當人係乜野至得咯？我憎鬼死個的老坑。你就如意算盤，之我唔肯照辦。

貴：（白）喂！人地係專員嚟㗎。（花下句）你做得專員嘅姨太，真係平地跳三關。你若果唔救我就一定瓜得，我當你做生菩薩扮。（跪求介）

太：（白）總唔信咁交關呀！

貴：（口鼓）唔係喇，呢的事情的確唔係講頭。（懇求介）

太：（白）好喇，咁麻麻地即管答應左你一趟喇！

貴：（口鼓）真嘅！（喜擁姨太介）咁我即刻請專員出嚟食午餐。（欲下介）

太：（一手拉住，白）咪住！若果佢知道我係你三奶，人地假假地都係專員，點吼到呢個爛燈盞。

貴：（想介，白）係囉！（口鼓）嘩！我唔會認你係妹咩？咁唔係可以通晒關咯。

（地錦，貴欲入衣邊，專員由衣邊出，相遇介）

貴：（白）哦！專員，等我嚟介紹吓。（指妾）呢個係我三……（一撻）係我三妹，請原諒佢禮儀未慣。（對妾）三妹，呢位係趙專員……

專：（口鼓）好話，好話，令妹的確係雅淑幽嫻。（注望介）

太：（口鼓）趙專員，呢次落鄉一定好多公事辦。

貴：（口鼓）係囉！所以我聊備洗塵薄酌，共專員你飲一番。（叫梅香上擺酒介）

（三人入席，太斟酒，碎牌同飲介）

貴：（白攬）專員呀專員，地方嘅事情唔係易辦。揸得緊又得罪人，放得寬時又受上峯責難。（去聲）因為我一向肯辦事，替公家負責唔怕麻煩。所以難免樹大招風，多才就招忌彈。剛才的鄉民就誣捏我，望專員把此案推翻。（雙句）

專：（接）我就冇問題，可以將你嚟徧袒。不過礙於黨部共參議會，七口八岩嶼。所謂獨手難遮

天，確係幾惡辦。（雙句）（故作難色介）

太：（以眼色告貴，時機未熟介，口鼓）嘩！呢的事情慢慢傾喇，唔好講到羹殘菜冷。噲！專員，呢處有鮑魚呀（夾一件送面前），呢處重有乾煎石斑。我敬專員一杯，祝你前途無限。

（舉杯親近獻媚介）

專：（白）我好量淺嘅咋，三小姐。

太：（口鼓）唔緊要，飲醉左唔係休息吓，係我嘅房間囉！

貴：（口鼓）等我去叫人準備參湯，就醉左都唔慌撞板。（會意關目下）

太：（靠近親切勸飲介）（口鼓）飲喇專員，我地唔好拘執至啫。

專：（白）好好……（開邊接酒飲介）

（太再斟酒勸飲，專員乘勢執手撫摩，意馬心猿介）

（貴乘時卸上，見狀，會心微笑介）

專：（回頭見貴，尷尬白）蝦！你令妹隻鑽戒真好野嚟！

貴：（口鼓）好野哩？我以為我至識寶，原來專員亦係咁好眼。（雙關語）

專：（口鼓）睇佢光芒四射，（戒指指）咁靚貨色，的確冇乜彈。（亦相關語）

貴：（口鼓）若果中意就送俾專員，但求唔嫌棄，我就歡喜無限。

太：（口鼓）專員邊處會中意我地。（重一搥）

專：（忙白）唔係咁講，中意！中意！

太：（續口鼓）中意我地的爛鬼火鑽呀！專員，你話阿哥惜得幾交關。（獻媚介）

貴：（笑介）哈哈（花下句）你個十月芥菜，我明你說話句句相關。（白）等我同你開口啱。

（唱）專員呀專員，我想把舍妹付託終身，唔知山鷄可入得鳳凰眼。

專：（花下句）但願得成好事，至怕難以高攀。

貴：（白）唔係咁講！

專：（花）係咁就做埋親戚，可謂相逢恨晚。

（好大舅，好妹夫互稱，喜介）

太：（白）專員，而家敢大胆問聲嘞，咁，究竟我阿哥佢案點辦呀？（痴纏介）

專：（白）哦！的鄉民告佢個佢案呀？噓！有問題！有問題！有問題！（擺手搖頭介）

貴：（撲燈蛾白攬）我重有一件事，要向妹夫你麻煩。的奸匪共游擊，條鄉間嚟作反。專門同我

地，的有錢佬為難。我想負責去清鄉，為政府嚟除禍患。（雙句）

太：（白）專員，帶挈吓阿哥喇！

專：（想想介，白攬）咁就委你為自衛大隊長，呢個肥缺你都啱。餉械自籌自給，我知你亦曉

辦。馬上就算上任，等我把委令頒。（雙句）（在公事袋內取委令介）

（貴忙自己入取筆墨，興緻地上）

（專員寫介）

太：（挨身在專員背讀介）「茲派何貴爲西鄉清鄉自衛大隊……」

（專員寫至隊字故不下筆介）

太：（急白）大隊乜野至得咯？點解唔寫啲？

（專員脅肩作卑賤的笑，表示要熱性介）

貴：（白）「長」啲！專員。（取一疊鈔票放檯上）

專：（白）「長」？係！都係要「長」至得！（意思是價目要增長）

貴：（白）要長！要長！又長的呀！（又取鈔票介）

如是（「長」了兩三次，專員打量鈔票已覺滿意，便寫妥委令，交官仔貴，并將銀紙連其他

文件納入皮包中介）

太：（口鼓）難得專員昇面，阿哥你快的把清鄉事辦。

貴：（口鼓）好唔好叫鄉長到嚟呢處，等專員你訓示一番。

（專員點頭官仔貴叫家丁往請鄉長介）

貴：（口鼓）咁！先籌購五十枝大槍，抽一百名壯丁，成立大隊部急不容慢咯喇？

專：（白）唔使咁多槍喇。

太：（口鼓）我地勢力雄厚，即係保護專員咯，所謂休戚相關。

專：（白）係！係！亦係道理。

（地錦，家丁帶鄉長上，行禮介）

專：（一表正經狀口鼓）你就係鄉長呀嗎？而家我委佢為大隊長，你應該聽佢指揮把清鄉事辦。

負責為服務之本，要不畏艱難。

貴：（口鼓）聽到冇！專員叫你聽我指揮，不准偷閒躲懶。你即刻同我做招牌，（一搥）雕大印（

一搥）整衿章（一搥）印信紙（一搥）馬上成立，抽丁組織自衛班。自衛隊籌購五十枝大

槍……

鄉：（專員及官仔貴口鼓時低頭連聲稱是至此頗有難色介）（口鼓）要買五十枝大槍！呢筆款怕

幾難籌辦嚟。

貴：（口鼓）點難呀？你真有用嘅！唔會係全鄉戶口分攤咩。交帶事情快的番去照辦。

（鄉長無奈應是，退下介）

貴：（口鼓）專員，聽日把舍妹送到府上，免至你麻煩。

專：（白）唔好！唔好！（拖貴出台口耳語介，表示不能見光，花下句（我出廣州搞掂晒然後至通知你，因為我個太座好野蠻。

（幕急下）